

摘藻堂四庫全書薈要

集部

欽定四庫全書蒼要卷一萬四千四百六十四

集部

宛陵集卷二十四

宋 梅堯臣 撰

郭之美忽過云往河北謁歐陽永叔沈子山

春風無行迹似與草木期高低新萌芽閉戶我未知忽
聞人扣門手把蟠桃枝問我此蟠桃緣何結子遲但笑
不復荅問者當自推振衣向河朔河朔人偉奇以茲不
荅意遲子北歸時

讀蟠桃詩寄子美永叔

此詩見歐集

韓孟於文詞兩雄力相當偶以怪自戲作詩驚有唐篇
章綴談笑雷電擊幽荒衆鳥誰敢和鳴鳳呼其凰孟窮
苦累繫韓富浩穰穰窮者啄其精富者爛文章發生一
為宮擘斂一為商二律雖不同合奏乃鏘鏘天之產奇
怪希世不可常寂寥二百年至寶埋無光郊死不為島
聖俞發其藏患世愈不出孤吟夜號霜霜寒入毛骨清
響哀愈長玉山禾難熟終歲苦饑腸我不能飽之更欲

不自量引吭和其音力盡猶勉強嗟我於韓徒足未及
其牆而子得孟骨英靈空北邙誠知非所敵但欲繼前
芳近者蟠桃詩有傳來北方發我衰病思藹如得春陽
欣然便欲和洗硯坐中堂筆墨不能下怵怵若有亡老
雞觜爪硬未易犯其場不戰輒自却雖奔未甘降更欲
呼子美子美隔濤江其人雖憔悴其志獨昂昂氣力誠
尚對勝敗可交相安得二子接揮鋒兩交鏖我亦願助
勇鼓旗譟其旁快哉夫子樂一醵宜百觴乖離難會合

此志何由償

孫司諫知鄧州

甫

南陽漢名都其俗尚敦樸亡徒頃為盜刺史安與角田
野遂焦熬蒿菜思沃濯茲雖得甘露向已苦風電更張
固所重下令未宜數且觀道傍碑文字今已剥

史尉還烏程

宏

與君去年別君來竟悲喜乘馬夜訪君備陳昔行李五
月辭吳中六月渡楊子七月行喪妻是月子又死買棺

無橐金助貸賴知己嬌兒晝夜啼
幼女飲食止行路況炎蒸悲哀滿
心耳青銅不忍照憔悴鄰於鬼八
月至都下少長疾未已一婢復嗑
然老媪幾不起君門日預朝僕乘
貧可恥十月補王畿受代隔歲紀
閉門陋巷中悶默閱書史初聞君
至之如見湖山美今聞君復還為
我謝雲水故交儻相問懷抱今如
此豈乏南飛鴈豈無東下鯉自同
嵇康懶作書愁把紙

薛九宅觀雕狐圖

蜀中處士李懷衮手畫皂雕擒赤狐猛爪入頰紫迸血
短尾獨使窮蹄鋪雕爭怒力虎爭死二物形意無纖殊
一禽一獸固已別硬羽軟毛非筆模入君此室見此圖
如在原野從馳驅

寄汶上

大第未嘗身一至人猜巧宦我應非彈冠不讀先賢傳
說劒休更短後衣瘦馬青袍三十載故人朱轂幾多違
功名富貴無能取亂石清泉自憶歸

蕭著作宰豐城

王都二月花正開
社雨作陰迎燕子
人先春色向江南
江南春色歸春水
拍岸綠波生荻芽
晨羞聊可助甘旨
縣涂為政子所諳
不敢贈言言且鄙

董安員外之信州鉛山簿

古岸綠蒲老春帆
逆水輕烹鮮聊以芼
沂險復兼程可用
茲時樂無將遠道
驚曾為江上客
因贈北人行

弟得臣殿丞簽判越州

前為山陰宰

再為會稽行聊問會稽美禹穴遷所探秦望斯所紀年
代已浸深書碑必亡矣剡溪有樵風其事恐非是買臣
千載後得無負薪子黃庭昔換鵝道士儻不死行當訪
其真願以鵝報爾慎勿笑我癡萬事難可擬摘笋復盈
檐緡魚新出水此又食之珍因書悉條理

李舍人淮南提刑

啄木欲除蠹蠹去樹亦撓何須食微蟲爾腹豈不飽天
下本無事自為庸人擾君實知古深終慙用傾巧

吳殿丞代州通判

舉才不避勢必也知其長王官誠濟濟豈得佐邊疆代
郡實雄要昔已選帥良功名乃欲取叱馭登太行

和人喜雨

仲冬至仲春陰隔久不雨耕農將失時萌穎未出土帝
心實焦勞日夜不安處禱祠煩駿奔彤饗杳無補帝時
降金輿徧歎靈真宇百姓知帝勤變愁為鼓舞和氣能
致祥是日雲蔽午夕風不鳴條甘潤忽周普已見堯為

君安問誰為輔

胥員外之復州景陵尉

城隅漢水濶正足槎頭鱸采苧蕪登俎施眾不貴錢江
帆風勢美竹屋雨聲連必有蒼苔碣留為好事傳

李審言歸鄭州

嘗從京索間躍馬望春山氣象歸王國丘陵接漢關長
榆啼鳥亂細草牧陂閒老厭行涂路因歌送子還

李舍人見過

春泥無處所窮巷少人行忽枉青絲騎曾非白面生笑
言聊與適雞黍未嘗烹莫歎余貧甚吾儕業本清

春鶻謠

春巢壘壘衆鳥哺兒衆鳥不出巢群雛噉噉腹甚饑不
出巢其謂何上有蒼鶻窺其窠問鶻何仇鶻不我顧我
巢有雛開口待哺一日不擊巢雛不食爾憂爾雛衆鳥
號呼又可吁

來夢

忽來夢我于水之左不語而坐忽來夢余于山之隅不語而居水果水乎不見其逝山果山乎不見其途爾果爾乎不見其徂覺而無物泣涕漣如是歟非歟

汴之水二章送淮南提刑李舍人

汴之水分于河黃流濁濁激春波昨日初觀水東下千人走喜兮萬人歌歌謂何大船來兮小船過百貨將集王都那君則揚舲兮以紉刑科

汴之水入于泗黃流清淮為一致上牽下櫓日夜來千

人同濟兮萬人利利謂何國之漕商之貨實所寄我送
行舟于水之次春風吹兩旗君作天王使畧客自求魚
清江莫相避

宋次道一百五日往鄭拜墓

去不避春雨泣望松栢門颺然風悲響如感泉下魂沃
醑向墳土空濕陳草根人歸夜月冷石馬在九原

孫太祝亳州簽判

微風起船尾雨氣生日脚不愁春路泥正泛春波樂順

去疾鳥飛問程殊我度才名留守家更入尚書幙

寄靈隱通教僧

奇山若洗青草木生石上根萌不可窮條蔓自增王其
陰有高僧日食惟一盞世人久已踈猿鳥應相向

李少傅鄭圃佚老亭

莊生迷天理老固當念佚舉世用自勞誰能以為必我
公謝鼎司嗣子都華秩代言輟帝右作藩輔王室承顏
向茲地園宇樂永日佳樹發已繁脩竹移未密春禽時

弄吭清景付吟筆朱金待金構榮美安與匹

令狐秘丞守彭州

挺

前時草草別渺漫二十年從宦各所適非為道路偏今
始一相遇言愧少壯前子有萬里翮尚不飛雲烟而復
走隴蜀欲以條教宣將西過危棧葉暗聞杜鵑未知為
郡樂預已抱愁煎再來與子辭當去復留連且念前期
遠歲月實易遷

依韻和李舍人旅中寒食感事

一百五日風雨急斜飄細濕春郊衣梨花半殘意思少
客子漸老尋游非戢戢車徒九門盛寥寥烟火萬家微
今朝甘自居窮巷無限墻間得醉歸

依韻和張應之見贈

京洛多游好相與歲月深雖同執一籥吹曲各異音自
微衆音響安感萬物心我窮子來唁慷慨發長吟

哭尹子漸

其弟師
魯守潞

故人河內守昨日報已亡同氣泣上黨悲風生太行曩

為衆所惜今復人共傷阮籍本真率感慨壽不長

次道約食後同敏叔中道平叔如晦詣景德浴以
風埃遂止

昔思春服成浴乎沂水上仲尼亦所志語此雖未向子
今當是時有意同我尚已邀二三友欲往期畢餉倏然
風滿途塵土阻清曠安得一振衣徒希舞雩唱

陳經秘校之信州幙

東吳海物錯南楚江味多家吳而宦彼風土去幾何既

得風土樂可贊政治和歸來識香草為綴楚人歌

朱武太博通判常州兼寄胡武平

昔我陽夏公嘗茲同郡治政餘作東園草木尚有意豈
不務安養斯民歌樂易是時有賢才鄉舉堪皇器今方
居家廬試質當時事願君思前人文雅庶未墜

師厚云蝨古未有詩邀予賦之

貧衣弊易垢易垢少蝨難群處裳帶中旅升裘領端藏
跡詎可索食血以自安人世猶俯仰爾生何足觀

依韻和中道寶相花

嘉卉得所托植君之寢陽開榮同此春
淡艷自生光不為露並色不為風盡香
節換葉已密尚可見餘芳

手問足

擬陶
體

共生一體中出處常相并所動輒有跡
何不擇地行履鳥雖可蔽步武豈無聲
嘗思汝為玉請則見直誠

足荅手

上下各有分同質實異支要用固爾先
當念扶我危我

則爾獨安何以幸華夷且願縮袖間操執自有時

目釋

我居元首間分並日光左右各照耀盲一豈相妨尚
恐有所賢獨見不能強嗟爾手與足何為欲競傷捉馳
自有職勿使心悲涼

贈葉山人

傾珍奉賓客傲物去珥貂貴來不以屈飲酒且逍遙黃
金百鎰盡左右無纖腰但存丹砂術有道在一瓢

李廷臣通判蔡州

夾路青青草隨君去未休亦將離思遠還共翠心抽細
藉車輪穩薰牽野蔓柔王孫歸不久冉冉莫經秋

朱櫻

明珠摘木末紅露貯金盤始見侍臣賜已為黃雀殘味
兼羊酪美食厭楚梅酸苑囿東周盛疊疊映葉丹

悼子

小名
十十

舟行次符離我子死阿十臨之但驚迷至傷反無泣款

定始懷念內若湯火集前時喪爾母追恨尚無及邇來
朝哭妻淚落襟袖濕又復夜哭子痛併肝腸入吾將仰
問天此理豈所執我惟兩男子奪一何太急春鳥獨蔓
延哺巢首戢戢

懷悲

自爾歸我家未嘗厭貧窶夜縫每至子朝飯輒過午十
日九食藿一日儻有脯東西十八年相與同甘苦本期
百歲恩豈料一夕去尚念臨終時拊我不能語此身今

雖存竟當共為土

和中道雨樹

一旬苟不雨萬木昏蒼蒼朝見洗林葉動搖生輝光晚
逢開踈陰枝上漏微陽翠色固以好安得無秋霜

永叔寄詩八首并祭子漸文一首因采八詩之意
警以為荅

昔聞退之與東野相與結交賤微時孟不改貧韓漸貴
二人情契都不移韓無驕矜孟無醜直以道義為已知

我今與子亦似此子亦不愧前人為北都健兒昨日至
扣門乃得所遺詩上言病中初有寄下言我詠蟠桃枝
盛衰開落感殘杏暮春無事羨游絲班班鳩鳴忽懷念
一掃十幅無閒辭洛川花圖多品目鬪新爭巧始可疑
讀書又憶石夫子似蠶作繭誠有之鎮陽歸與北潭北
吟此八章誰謂癡最後有文弔尹子壽夭難問信所悲
共書大軸許傳玩一日百展曾忘疲報君亦欲齎滿軸
恐費紙墨令人嗤

黃敏復尉新城

新城接桐廬山茗久所利江東亡命兒販不畏黥劓堂
上千金子捕以操兇器恐非吾徒為勇少乃可避

寄永叔

夏日永以靜渴鳥方在枝張口不能言翕翕兩翅披庭
中有井泉井深無綆縻欲汲假其鄰鄰且非我知鴻鷗
矯河上比爾得所宜得宜豈不樂胡然我念之

丞相二章

丞相之拜冠弁旅至乘馬載驅如彼鉅渚有鴈有鷺有
龜有魚烝然來萃翔泳嘯呼

丞相之去乃還印綬乃飭車輪如彼涸津時靡翔羽時
靡游鱗寂兮寂兮豈有嘉賓

閔讒狡二首

矯有讒狡讒以戕類狡以媚其貴謂不騫不墜謂人莫
爾制而死制之誰謂無鬼孰制之死

彼狡之將死若有以見既見既惡之引袂蒙面謂人莫

爾辨而自辨之誰謂無鬼孰俾之譴

薛八殿丞有遺

未嘗營貨貝貨貝寧為來俸苦月不足貧死口肯開好事忽我恤十千助晨杯薪水已過豐不得如顏回

師厚與胥氏婦來奠其姑

雙裾來此室慟哭拜靈牀魂衣想髣髴薄酒湛其觴含悽拊孤稚拭淚問平常我生都無如仰看燕在梁

諭烏

百鳥共戴鳳惟欲鳳德昌願鳳得其輔咨爾孰可當百
鳥告兩間惟鳥最靈長乃呼鳥與鵲將政庶鳥康鳥時
來佐鳳署置且非良咸用所附已欲同助翱翔以燕代
鴻鴈傳書識暄涼鸚鵡代鸚鵡剥舌說語詳禿鶻代老
鶴乘軒事昂藏野鶻代雄雞爪紫稱擅場雀豹代雕鷲
搏擊肅秋霜蝙蝠嘗入幙捕蚊夜何忙老鴟啄臭腐盤
飛使游揚鵲鵲與梟鵬待以為非常一朝百鳥厭讒鳥
出遠方鳥伎亦止此不敢戀鳳傍養子頗似父又貪噪

豺狼為鳥鳥不伏獸肯為爾戕莫如且斂翮休用苦不
量吉凶豈自了人事亦交相

弔裴易進士

力學未及仕口中已含珠賦命固所負讀書非所辜斂
送有兄弟哭泣無妻孥惟此靡薄厚必竟同一途

閒詠寄呈次道

我閒日貧縛子閒數疾纏閒固不可常吾觀與子然吾
與子嗜學豈獨閒窮年安安者誰歟分亦似所偏

寄楚州呂濟叔

亭午鳥不下誰復過我廬忽聞扣門者偶出問何如云
是山陽吏太守遣置書自惟久窮困游子安念予淮陰
況要津賓館無暫虛豈意有所逮委曲情未踈報言愧
不覩聊以謝興居

荅中道小疾見寄

嵇康性彌懶曾不廢養生子姑當妙年何乃勞其精老
聃有至論身孰親於名詩本道情性不須大厥聲方聞

理平淡昏曉在淵明寢欲來於夢食欲來於羹淵明儻
有靈為子氣不平其人實傲佚不喜子纏縈吾今敢告
子幸願少適情時能與子飲莫惜倒鉶罍

五月五日

屈氏已沉死楚人哀不容何嘗柰讒謗徒欲却蛟龍未
泯生前恨而追沒後蹤沅湘碧潭水應自照千峰

送可教僧歸越

萬事厭尋常羨慕每不足居南多北思在遠慙近俗既

來橘變枳但見空條綠氣味誰復論孤根逗崑曲

和裴如晦雨中過其亡兄易居

人亡雨館寂車馬偶來臨濕衣添新淚故物傷夙心淒淒庭下樹萬葉起哀音此地嘗對語在昔豈知今

雨中宿謝胥裴三君書堂

急雨射窓鳴燈殘我正寢穴蚓聲苦長流響入孤枕衆醉如不聞強聒亦已甚夜短竟無寢困矐劇塵礧

和中道雨中見寄

雨淫止復落雲暗不少開泥將沒馬脰思子日幾迴我
既不可往子亦不可來屋漏又苦甚巾舄生莓苔安肯
問農畝惟憂無酒材但能置醇酎莫負吾樽壘

宛陵集卷二十四

欽定四庫全書薈要卷一萬四千四百六十五

集部

宛陵集卷二十五

宋 梅堯臣 撰

送謝寺丞新賜及第赴扶溝宰

世所重登科如君持才選麗賦驚宗工妙譽動京輦行
鷁路非遐雙旗風欲展聊閱民版餘應不負墳典

和李廷老三月十四日

三月日幾望士游溱水陽溱流已渙渙有美此翱翔偶

來適此願月色同滿牀士曰陟少室女曰歸大梁及晨
各異役悲喜竟回腸芍藥有遺風贈好期不忘固匪子
能逮是焉繼新章

苦熱

赤日若射火林風不動梢羸汗尚流沛冠服豈堪包貴
人諒有稟慣習非強教竊觀行車馬坐蕩劇煨炮寧思
山中人石泉浸兩腋

劉薛二君過予遇雨

猛雨迫好鳥止我屋室隅是時有劉薛亦既此焉俱我
廢秣爾馬我厨飯爾奴二人乃可語因觀爾馬圖古筆
得神妙俗工非所模收圖雨且止鳥飛當駕驅

答廷評宗說遺冰

仲夏邁餘閏屋室如炊蒸孰云窮處者言贈太官冰時
靡有暍死實亦賴友朋定能涼一席既已却青蠅吾心
久自信飲已不以矜

劉牧殿丞通判建州

平生交游少海內寡與期識君且恨晚一見已將離人
言何嗟別曾此非舊知借曰匪我舊亦既接音詞譬彼
空林鳥止息偶同枝忽有振翮去尚爾鳴聲悲我今臨
流送安顧俗所為

和中道伏日次韻

伏日每苦熱古來亡事侵嘗聞東方朔割肉趨庭陰百
職當早罷將畏赫日臨我無歸遺人懷念空霑襟

和蔡仲謀苦熱

大熱曝萬物萬物不可逃燥者欲出火液者欲流膏飛
鳥厭其羽走獸厭其毛人亦畏絺綌况乃服冠袍廣廈
雖云託呼風不動毫未知林泉間何以異我曹蠅蚊更
晝夜膚體困爬搔四序苟迭代會有秋氣高

儼上人粹隱堂

十年不出戶世事皆剗鋤時無車馬游焚香坐讀書有
堂曰粹隱惟見安且舒心遠迹非遠歲月速輪輿寓目
暫為實過者即為虛譬若開是室終日於此居欲問昨

日事已覺今日疎明朝却視今復與前何如聊悟此中
樂猶觀濠上魚

送鄭太保瀛州都監

秋氣入關河匈奴久已和
琱弓聊可試寶劍不須磨
草木將搖落牛羊自寢訛
能知塞垣景持以贈吾歌

送刁安豐

嘗游芍陂上頗見楚人為
水有鳥魚美土多薑芋宜
寧無董生孝將奉叔敖祠
舊令乃吾友寄聲於此時

劉八飲將散分得非休沐不得會

閏五月晦日

君非休沐時茲會豈能得我無官局縈幸爾預歡適莫辭衝雨歸歸時烏帽側

贈張處士

聞爾閑於琴寢處未嘗輟抱之京師來豈與工師列一奏流水聲落指鳴決決既曰林壑人安事塵土轍

將行與蔡仲謀飲分席上果得桃

曾無千歲人安見千歲實聊效昔所投瓊瑤報非一

答裴送序意

我欲之許子有贈為我為學勿所偏誠知子心苦愛我
欲我文字無不全居常見我足吟詠乃以述作為不然
始曰子知今則否固亦未能無諭焉我於詩言豈徒爾
因事激風成小篇辭雖淺陋頗尅苦未到二雅未忍捐
安取唐李二三子區區物象磨窮年苦苦著書豈無意
貧希祿廩塵俗牽書辭辯說多碌碌吾敢虛語同後先
惟當稍稍緝銘誌願以直法書諸賢恐子未諭我此意

把筆慨歎臨長川

和張士曹應之晚景

遠空雲解駁南陌雨初收
獨鳥去烟外斜陽明樹頭
涼颼虛枕席漲潦起汀洲
會有從軍役將離更暮愁

送楊浩秘丞入蜀

有才不得試志亦無所干
有母不得養法當之遠官
雖曰在民政孝心寧得安
志願且未遂而趨蜀道難行思
叱馭者勿復苦長歎

乙酉六月二十一日予應辟許昌京師內外之親
則有刁氏昆弟蔡氏子予之二季友人則胥平叔
宋中道裴如晦各攜肴酒送我於王氏之園盡歡
而去明日予作詩以寄焉

性僻交游寡所從天下才今朝誰出祖親戚持樽壘晚
節相知人惟有胥宋裴所欠謝夫子歸穰尚未回岸傍
逢名園繫舟共徘徊嘉蓮如笑迎照水呈丹顙南庭蒲
萄架萬乳纍將碓羣卉競瑣細紫紅相低俚尋常固邂

迢孰辨落與開酒闌各分散白日將西顏城隅遂有隔
北首望吹臺

開封古城阻淺聞永叔喪女

去年我喪子與妻君聞我悲嘗俛眉今年我聞君喪女
野岸孤坐還增思思君平昔憐此女戲弄膝下無不宜
昨來稍長應慧黠想能學母粉黛施幾多恩愛付涕淚
灑作秋雨隨風吹風吹北來需我袂哀樂相恤唯已知
自古壽夭不可詰天高杳杳誰主之以道為任自可遣

目前況有寧馨兒

寄謝開封宰薛贊善

予生多不偶事事相與背適從平川役乃遇河決潰舟
膠在中野寸步使心悔誰知赤縣尹勤恤每外內文符
飭亭長寇盜虞鼠輩仍能饋餅餌童稚仰所賚今又置
酒壺惠問亦已再令我清夜飲是夕值月晦獨酌效謫
仙而復無影對如何亡情游似亦有世態家人誠可同
況我昨喪配雖曰預朝裾左右無粉黛兀然唯書史舊

學厭瑣碎欲探文字工下筆語多礙却思君西齋新治
虛可愛燕坐禽鳥寂吟哦簿書退此樂吾未如區區勞
覆載

草木

草木無處所動搖知風形今日萬葉黃昨日萬葉青青
既漸衰變黃亦漸凋零人生恃歲月種柏滿郊坰

夢登河漢

六月二十九日

夜夢上河漢星辰布其傍位次稍能辨羅列爭光芒自

箕歷牛女與斗直相當既悟到上天百事應可詳其中
有神官張目如電光玄衣乘蒼虬身佩水玉璫丘蛇與
穹鼈盤結為紀綱我心恐且怪再拜忽禍殃臣實居下
土不意涉此方既得接威靈敢問固不量有牛豈不力
何憚使服箱有女豈不工何憚縫衣裳有斗豈不柄何
憚挹酒漿卷舌不得言安用施穹蒼何彼東方箕有惡
務簸揚惟識此五者願言無我忘神官呼我前告我無
不臧上天非汝知何苦詰其常豈惜盡告汝於汝恐不

祥至如人間疑汝敢問於王叩頭謝神官臣言大為狂
駭汗忽爾覺殘燈熒空堂

寄宋次道中道

再來魏闕下舊友無一人或為美官去或為泉下塵晚
歲相知者操節許松筠日世常山公伯仲文學均與我
數還往以義為比鄰屢假篋中書校證多獲真次述盈
百卷補亡如繼秦中作淵明詩平淡可擬倫於時多驕
佚黃卷罕所親昨以興西師往往劒射伸短衣誇走馬

睥目語常瞋欲效西山勇遂笑東魯仁捨本趨富貴乃
與市賈濱以此較於子素業固未泯前日之許昌別君
已經旬偶然值河決窮坐如涸鱗臨風思有寄夜詠還
達晨

日蝕

赫赫初出咸池中浴光洗跡生天東不覺有物來晦昧
團團一片如頑銅前時蝦蟇食爾妃天下戢戢無有忠
責罵四方誰膽大仰頭憤憤唯盧仝欲持寸刃去其害

氣力雖有天難通是時了無毫芒益徒有文字辯且雄
全死於今百餘載日月幾度遭遮蒙有人見之如不見
誰肯開口咨天公老鴉居處已自穩三足鼎峙何乖慵
而今有嘴不能噪而今有爪不能攻任看怪物翳天眼
方且省事保爾躬日月與物固無惡應由此鳥招禍凶
吾意髣髴料此鳥定亦閃避離日宮安逢后羿不乖暴
直與審憖彎強弓射此賈怨鳥以謝毒惡蟲二曜各安
次災害無由逢南不尤赤鳥東不誚蒼龍北龜勿吐氣

西虎勿嘯風五行不汨陳虞舜生重瞳我今作此詩可
與全比功

寄王江州

休嗟謫官去山根勝窮邊當職言無隱他時事好還何
嘗聞堠火唯是對爐烟潮到湓城否猶期信可傳

薛九公期請賦山水字詩

薛君堂懸山水字請我試作山水詩呼童磨墨慰君意
強作安得有好辭昔年曾是杜陵客東城水上橫此碑

字方數尺形勢健豈似取次筆畫為東城父老語於我
推本初自開元時不知當時何所用費功鐫刻為環奇
我去長安十載後此石誰輦來京師苑中構殿激流水
暮春修禊浮酒卮是時詞臣出不意酒半使賦或氣萎
日斜鳴蹕不可駐未就引去如鞭笞脫我幸得預此列
玉階立寫從然其今雖下筆不稱意已書滿幅令君嗤
七夕有感

去年此夕肝腸絕歲月淒涼百事非一逝九泉無處問

又看牛女渡河歸

過開封古城

荒城臨殘日雞犬三四家豈復古阡陌但問新桑麻
頽垣下多穴所窟狐與蛇漢兵墮銅鏃青血為土花

通判桃花廳

自此詩許州起慶歷五年秋盡六年夏

種桃西庭下有意延東風東風與雨至染出枝上紅
花底有小鳥其字曰桃蟲既於桃得名為桃言女工翦羅
作舞衣奉君歡莫窮舉杯無愧者避世武陵翁

任廷平歸京 并序

廷平任君往者登進士科入許幕後二年予被太原公
辟與君為代君之嚴君以太子少保致仕西都西都去
許其道有三北趨鄭過函谷而至洛陽其途曲遠西趨
汝由闕塞而河南其途小艱然邇於北道西北趨登封
歷轅轅而至洛師其途險惡不與二道比君之歸也捨
二道之平易踐西北之險惡何哉是非急於拜慶耶豈
特與人情異歟噫人以為險在君為易由出於天誠不

為難也出天誠易險道可謂孝也乎其行予故作詩以送之

言之少室西定陟輶輳險歸心不避危夕枕屢成魘秋聲故苑空野氣荒陵掩獨念京洛塵曾將客衣染

和通判太博雞冠花十韻

神農記百卉五色異甘酸乃有秋花實全如雞幘丹籠烟何聳聳泣露更團團取譬可無意得名殊足觀逼真歸造化任巧即彫剜赤玉書留魏丹砂句誦韓

魏文帝與鍾繇

求玉珎書論玉云赤如雞冠韓誠能因物比誰謂一時
文公鬪雞聯句云頭垂碎丹砂
難有客驅辭穎臨風運筆端嘗嗟古吟缺每惜此芳殘
揣情苦精妙繼音慙未安

秋夜感懷

風葉相追逐庭響如人行獨宿不成寐起坐心屏營哀
哉齊體人魂氣今何征曾不若隕籜繞樹猶有聲涕淚
不能止月落雞號鳴

依韻和通判八月十五夜招翫月二章

尋常圓魄豈不好競愛今宵分外明明極只知無隔礙
誰言桂樹向中生

一年一見最堪惜百歲百夕能幾多縱有明年似今夕
明年同會復如何

蚯蚓

蚯蚓在泥穴出縮常似盈龍蟠亦以蟠龍鳴亦以鳴自
謂與龍比恨不頭角生螻蛄似相助草根無停聲聒亂
我不寐每夕但欲明天地且容畜憎惡唯人情

秋風

秋風不饒物斗至聲已惡青林葉尚繁雖好將恐落人
意誠愛惜節候肯相若白髮無再玄盛衰茲可度

韓宗彥寺丞通判鄧州

往歲陪祠泰壇下始一相見如相知我今入幕君有待
喜得款語勝前時便嗟陳事日侵汨雖欲數面曾無期
忽聞兵吏已迎候馬有行色車將脂賀君有意事清簡
太守亦鄙尋常為騏驥步驟豈局促鳳皇羽翼多威儀

漢家近親不復有召父舊聞於今墮墮由狂者生利害
曾未略究民間宜祇言引水幸主賦矯請罷毀功何施
千載厚惠一日去至今農畝空嗟咨夫子才高識且遠
勿畏勢力重扶持他年人作去思頌願以大字書長碑

韓欽聖問西洛牡丹之盛

韓君問我洛陽花爭新較舊無窮已今年誇好方絕倫
明年更好還相比君疑造化特著意果乃區區可羞恥
嘗聞都邑有勝意既不鍾人必鍾此由是其中立品名

紅紫葉繁矜色美萌芽始見長蒿萊氣焰旋看壓桃李
乃知得地偶增異遂出羣葩號奇偉亦如廣陵多芍藥
間井荒殘無可齒淮山邃秀付草樹不產髦英產佳卉
人於天地亦一物固與萬類同生死天意無私任自然
損益推遷寧有彼彼盛此衰皆一時豈關覆幬為偏委
呼兒持紙書此說為我緘之報韓子

夢感

生哀百十載死苦千萬春何為千萬春厚地不復晨我

非忘情者夢故不夢新宛若昔之日言語尋常親及寤
動悲腸痛逆如刮鱗

秋鴈

秋鴈多夜飛前羣後孤來儔合鳴自得隻去音已哀哀
音能感人腸酸非食梅共將形影對安得不早衰

依韻和通判把菊有寄

湖邊草樹多蠹葉已少色唯菊不畏霜淡艷如有德自
與蘭並生非因人所植愛貴曾未厭秋日短苦逼朋好

各相望採持空歎息臨杯不能飲對案不能食借問君
何憂節物感人極

曹承制知永康軍

修

鐵驄黃金羈年少蜀城守蜀城臨古江正在離岸口離
岸李涼鑿其利實不久既避沫水害又以溉田畝大此
百民宜遺祠奉牲酒行當謹厥事無乃為政首

三鳥

翩翩三奇鳥各擇松桂宜二鳥同所向並立高高枝一

鳥依別樹屈比二鳥卑嗟嗟天下鳥莫與三鳥期三鳥
鳴少和蒿間多鶯斯頻頻徒爾黨三鳥安可欺

龍箕一首

并序

在昔賢人良輔之生也或山之神靈和氣之鄰或星之
魄曜晶明之所鍾故詩有崧高之作稱厥甫申傳說騎
箕之說又得之前古公之誕日考之星歷月次於箕宜
與說同也夫登翊王室為宋鉅臣豈徒然歟謹依雅頌
作龍箕一章十八句以獻


龍箕在天莫不孕靈我公生之既生既德曾誰與京爰
弼帝右繼序其榮之贊我太平萬事其成之殿我輔邦
庶民其寧之政靡薄厚百職其揚之宜言顯光永錫乎
后王迺祝眉壽迺獻兕觥福祿其將之

宛陵集卷二十五

謹案卷二十四第十四頁後二行百鳥告兩間刊

本兩訛爾據宋元詩會改





總校官庶吉士臣張能照

校對官庶吉士臣戴心亨

謄錄舉人臣孫潢

欽定四庫全書薈要

集部

宛陵集卷二十八

六至

詳校官助教臣常循



欽定四庫全書薈要卷一萬四千四百六十六

集部

宛陵集卷二十六

宋 梅堯臣 撰

李廷老自蔡州見訪云明日便歸鄭

故夜相過秉燭為開席車馬立在門樽酒豈暇索疊
疊別後言忽忽恨將適既去暝色合不可見行跡

墨竹

許有盧娘能畫竹重抹細拖神且速如將石上蕭蕭枝

生向筆間天意足戰葉斜尖點映間透勢虛黏斷還續
粉節中心豈可知淡墨分明在君目

江寧李諫議

滄江石頭下沄沄瀉天東寒潮日夕至不與廢興同陞
下始封地氣象常鬱葱六代有舊跡物景付與公切莫
負山水可追王謝風

方在許昌幕內弟滁州謝判官有書邀余詩送近
聞歐陽永叔移守此郡為我寄聲也

從事滁陽去寄音苦求詩吾詩固少愛惟爾太守知不
敢輒所拒勉勉作此辭山城本寂寞物色同淮夷淮俗
舊輕僇未識遠博宜無將麟在郊便欲等文狸爾去事
太守當矯庸庸為伊人道義富嘗立天子墀我輩在蟻
垤難謂太華卑又若游蹄涔安見滄海涯況於爾實親
告爾爾勿疑

送胥裴二子迴馬上作

陰陰雪雲低游子去將懶豈惟游子倦疲馬行亦欸送

罷我獨還迴看鴈為伴念此日暮時寂寞閉竹館

初冬夜坐憶桐城山行

我昔吏桐鄉窮山使屢躡路險獨後來心危常自怯下
顧雲溶溶前溪未可涉半崖風颭然驚鳥爭墮葉脩蔓
不知名丹實圻在荑林端野鼠飛緣挽一何捷馬行聞
虎氣豎耳鼻息歆遂投山家宿駭汗衣尚浹歸來撫童
僕前事語妻妾吾妻嘗有言艱勤壯時業安慕終日間
笑媚看婦靨自是甘努力于今無所懾老大官雖暇失

偶淚滿睫書之空自知城上鼓三疊

和平叔道傍竹

野田有脩竹叢疎飽於霜下上乏佳禽左右雜枯桑豈
無行路子行路厭榛荒忽見此翠色徘徊未能忘車馬
去何疾迴顧隔山岡

答裴如晦

懷我歌我辭乃知行子倦音雖彼妙發想若此可見歌
竟夜燈青野窓鳴濕霰髣髴聞孤鴻飛急應有羨

夜酌趙侯家聞合流曹光道詣府遂訪之一夕縱
談明日光道赴本任邀余詩送因叙其言以贈焉
方與舊將飲談兵燈燭前聞有故交至心喜輒論邊跨
馬踏明月往見競留連且共語出處予懷予久然男兒
太平時功業未可先故當守詩書道義躋古賢苟復不
得用卷以放林泉吾蘊誠若此奈何貧所纏仕宦偶同
郡文字可以傳行行志茲語聊用樂永年

暮雪

暮雪止復落暗積如避人
平明視庭中物物各已新
草木一變妍枯槁忘其真
隨風來無迹高下得以均
采薇歌卒章霏霏霑車輪
今豈無是作勞苦不足陳

西湖對雪

獨玩湖中雪移舟水凍灣
寒塘起孤鴈危樹失前山
著物偏能積衝風不礙還
無慙子猷興都盡剡溪間

依韻和資政侍郎雪後書事

風旗冷落偏欺酒衆樹芳菲欲並梅
人意不知南畝望

只驚鴻雁向川來

王龍圖知江陵

捧詔出荊州天心寄遠憂
行車踐殘雪寒色犯輕裘
祖軼山川闊歌驪道路愁
吏迎多越乘兵衛繁吳鉤
地與蠻溪接江通漢水流
風宜橘林賦俗尚竹枝謳
樽俎思疇日烟雲感舊游
終當勞侍從寧久渚宮留

依韻和通判太博雪後招飲二首

雪晴何所樂樂趣在杯中
况復君家美雕盤膾縷紅

邀飲奏醴醪案杯烹蟹螯吾非獨醒者莫頌楚人騷

依韻和資政侍郎雪後登看山亭

湖上晴烟凍未收湖中佳景可遲留更臨危樹看羣岫
雪色嵐光向酒浮

雪中通判家飲回

時一卒彈胡琴

朔風聲滿枯桑枝陰雲不定蛟龍歸凍禽聚立高樹時
密雲萬里增寒威訪君留連舉酒危胡琴奏罷歡已微
小駒跨去沒四蹄飄花凌亂霑人衣醉目遠望天地迷

何暇更問孤鴻飛茅屋豈無單且飢平明共賀麥壟肥
雪後資政侍郎西湖宴集偶書

潭心不凍處鴈鷺自相依積雪正無際因風忽起飛初
驚如避弋復下信忘機偶得從公飲聊書此景歸

近有謝師厚寄襄陽柑子乃吳人所謂綠橘耳今
王德言遺姑蘇者十枚此真物也因以詩答

荊州持大橘亦自名黃柑忽得洞庭美氣味何可參遂
生吳洲思恨不羽翼南

運使劉察院因按歷歸西京拜省

在昔志四海所遇非一途朝以言悟主夕即被金朱於
茲亦未幾用直升雲衢臺分東西屬御史從子除天馬
日千里豈並局促駒朔北遏亂萌褒嘉賜璽書乃衣漢
使繡威譽傾國都借問世上榮萬國與此殊明朝歸洛
陽聊且餞高車亭堠況非遠春郊無疾驅

余之親家有女子能點酥為詩并花果麟鳳等物
一皆妙絕其家持以為歲日辛盤之助余喪偶兒

女服未除不作歲因轉贈通判通判有詩見答故
走筆酬之

翦竹纏金大於掌紅縷龜紋挑作網瓊酥點出探春詩
玉刻小書題在牒名花雜果能眩真祥獸珍禽得非廣
礪落男兒不足為女工餘思聊可賞

元日

昔遇風雪時孤舟泊吳淞江潮未應浦盡室坐相對行
庖得海物醎酸何瑣碎久作北州人食此欣已再是時

值新歲慶拜乃唯內草率具盤餐約略施粉黛舉杯更
獻酬各爾祝鮐背咀橘齒病酸目已驚老態豈意未幾
年中路苦失配嘉辰衆所喜悲淚我何耐曩歡今已哀
日月不可賴前視四十春空期此身在世事都厭聞讀
書未忍退過目雖已忘寧捨心久愛何當往京口竹里
翦荒穢行歌樂暮節新菽甘自刈

通判遺新柳

園柳發新萋官居雪尚壅君喜持報春衰意非舊勇芳

非即可插予髮慙種種

送孫曼卿鎖廳赴舉

舊果豈非好截樹接新枝欲變明年花曾不根本移屈
彼自然性曰茲山水早子才實艷富久為人所推固當
升高科我送作此詩

依韻和劉察院送客回過溟水馬上有作

車騎踏春堤脩然思如濯望驄人自避解凍魚方樂擎
流古樹根跨岸枯薪約烟雲淡淡天嫩綠生叢薄

不知夢

夢中不知夢但謂平常時相與共笑言焉問久別離有
贈若有得及覺已失之人生在世間何異夢寐為

郟城道中

行行溪水邊鏡碧不可唾安知有沫流草木多偃臥潭
鳥瞥復沒灘沙淨如簸不獨荊州民居險頸癭大

汝州後池聽水

春水泉脉動分巖臨澗源津津出石齒泠泠縈竹根猶

和野雲翠復落郡池喧心靜意自適不知朝市煩

春鳩

鳴鳩識陰晦聒聒雌逐雄鵲巢汝得共可蔽雨與風春
物況不晚杏萼已半紅試看池館間燕雀隨西東

留別汝守王待制仲儀

來時柳未芽去見杏吐萼相歡無幾日節候已非昨
邂逅二十年三遇三睽索會合信難常焉用計疎數

夢覺

夕夢多夢之覺來遂成憶憶子生平時事往無一得信
若此夢寐豈不見顏色復存來告言言虛音匪默是覺
曷為真覺夢可以惑

汝州

主人少聽我為言風土殊美哉面有顙生此頸若壺噫
號無冬夏歲禱無嗟吁只憐郡池上不異山林居

逢牧

國馬一何多來牧郊甸初大羣幾百雜小羣數十驅或

聚如鬪蟻或散如驚鳥或踐麥無根或嚙樹無膚牧卒
殊不顧抱鞭入民墟欲酒與之飲欲食與之饋日暮卒
醉飽枕鞭當路隅茫茫非其土誰念有官租

寄滁州歐陽永叔

昔讀韋公集固多滁州詞爛漫寫風土下上窮幽奇君
今得此郡名與前人馳君才比江海浩浩觀無涯下筆
猶高帆十幅美滿吹一舉一千里只在頃刻時尋常行
舟艫傍岸撐牽疲有才苟如此但恨不勇為仲尼著春

秋貶骨常苦答後世各有史善惡亦不遺君能切體類
鏡照嫫與施直辭鬼膽懼微文姦魄悲不書兒女書不
作風月詩惟存先王法好醜無使疑安求一時譽當期
千載知此外有甘脆可以奉親慈山蔬采筍蕨野膳獵
麇麋鱸膾古來美臯胄今且推夏果亦瑣細一一舊頗
窺圓尖剝水實青紅摘林枝又足供宴樂聊與子所宜
慎勿思北來我言非狂癡洗慮當以淨洗垢當以脂此
語同飲食遠寄入君脾

衛州通判趙中舍

我久在河內頗知衛風俗沙田多種稻野飯殊脫粟況
聞別乘至佇望大河曲飲罷何以贈柔條路傍綠

資政王侍郎命賦梅花用芳字

許都二月杏初盛公府後園梅亦芳因思江南花最早
開時不避雪與霜主人惜春春未晚遂命官屬攜壺觴
酒行守吏摘花至素艷紫萼繁於裝天桃穠李不可比
又況無此清淡香豈辭盡醉對顏色頻嗅競粘鬚蕊黃

何時結子助調鼎我心舊職不敢忘

歐陽永叔寄琅琊山李陽冰篆十八字并永叔詩
一首欲予繼作因成十四韻奉答

我坐許昌塵土中山翠泉聲違眼耳公雖被謫守滁陽
日少郡事窮山水東南有風西北來忽得書詩連數紙
并寄陽冰古篆字字形矯矯龍蛇起其文乃只題姓名
大歷六年春氣尾報云此篆無人知野僧好事為公指
公留岩下久徘徊公別莓苔汲泉洗點畫雖然未苦訛

霜侵風剝多皴理公疑鳥迹踏蒼崖山祇愛惜將有以
雲藏至今不近俗月伴古源清且泚此石公知石不知
公與前人定知己墨模幾幅許傳玩譬於玦玉終可喜
況復為詩刻其下句奇字峻驚山鬼何當少得從公游
為公揮筆寧非美

依韻答范天民

古今冠佩立朝人多作北山松下塵我愛蟠桃種來久
開花結子不由春

樊推官勸予止酒

少年好飲酒飲酒人少過今既齒髮衰好飲飲不多每
飲輒嘔泄安得六府和朝醒頭不舉屋室如盤渦取樂
反得病衛生理則那予欲從此止但畏人譏訶樊子亦
能勸苦口無所阿乃知止為是不止將如何

依韻和通判二月十五日雨中

仲春月既望物候恰分中窓聽五更雨花開前日風詩
成止酒後病怯舉杯空短髮雖然黑心如一老翁

感春之際以病止酒水丘有簡云時雨乍晴物景
鮮麗疑其未是止酒時因成短章奉答

東風固無迹何處見春歸土逐草心坼雨兼花片飛雖
憐柔甲長只恐艷條稀君但惜晴景休言止酒非

和永叔琅琊山六詠

歸雲洞

洞深豈不有神物朝朝但見雲飛還雲收雨歇草樹濕
澗下流水空潺潺

琅琊溪

枯藤垂溪水已消
溪水濺濺石間亂
潭靜鳥呼人渡時
鳥驚人語來還散

班春亭

林下鳩鳴坼晴杏
田間水漫春溶溶
使君固自足風美
時傍青山去問農

庶子泉

沙穴石竇無限泉
此泉緣底名不減
庶子去來多少年

依舊清心共泉潔

石屏路

尋常畫屏多畫山何意此山還作屏峭排直上幾千尺
下有石路莓苔青

惠覺方丈

松門隱者我未識一見君詩如已爽歲月任隨人事遷
此身不動雲生壁

宛陵集卷二十六

欽定四庫全書薈要卷一萬四千四百六十七

集部

宛陵集卷二十七

宋 梅堯臣 撰

答宋學士次道寄澄心堂紙百幅

寒溪浸楮春夜月敲冰舉簾勻割脂焙乾堅滑若鋪玉
一幅百錢曾不疑江南老人有在者為予嘗說江南時
李主用以藏秘府外人取次不得窺城破猶存數千幅
致入本朝誰謂奇漫堆閒屋任塵土七十年来人不知

而今製作已輕薄比於古紙誠堪嗤古紙精光肉理厚
邇歲好事亦稍推五六年前吾永叔贈予兩軸令寶之
是時頗叙此本末遂號澄心堂紙詩我不善書心每愧
君又何此百幅遺重增吾報不敢拒且置縑箱何所為
二月雨後有蚊蚋

春夜一二蚊蚋飛久不見之尚可喜而今稍喧聒人
向後更暖奈爾觜

春寒

春晝自陰陰雲容薄更深蝶寒方斂翅花冷不開心亞
樹青帘動依山片雨臨未嘗辜景物多病不能尋

答韓三子華韓五持國韓六玉汝見贈述詩

聖人於詩言曾不專其中因事有所激因物興以通自
下而磨上是之謂國風雅章及頌篇刺美亦道同不獨
識鳥獸而為文字工屈原作離騷自哀其志窮憤世嫉
邪意寄在草木蟲魚來道頗喪有作皆言空烟雲寫形
象葩卉詠青紅人事極諛諂引古稱辨雄經營唯切偶

榮利因被蒙遂使世上人只曰一藝充以巧比戲弄以
聲喻鳴桐嗟嗟一何陋甘用無言終然古有登歌緣辭
合徵宮辭由士大夫不出於瞽矇予言與時輩難用猶
篤癰雖唱誰能聽所遇輒瘖聾諸君前有贈愛我言過
豐君家好兄弟響合如笙叢雖欲一一報強說恐非衷
聊書類頑石不敢事磨礱

前以詩答韓三子華後得其簡因叙下情

前者報君詩妄說良有以昔予在京師多為人所詆短

章雖無工實未甘藝比因君有過褒聊且發憤排何言
敢為師乃是貴不韙平常遭口語攢集猶毒矢此論苟
一出是非必蜂起偶爾道瘖聾多疑已竊指雖恃不欺
衷恨未致速死安得二頃田歸耕曷為恥誰能事州郡
雞狗徒聒耳

過潁橋懷永叔

昔送之官東郡時夜闌對酒風揭屋君今淮海予再過
古驛依依老槐綠

堪澗畫夢

誰謂死無知每出輒來夢豈其憂在途似亦會相送初
看不異昔及寤始悲痛人間轉面非清魂歿猶共

靈樹舖夕夢

畫夢同坐偶夕夢立我左自置五色絲色透縑囊過意
在留補綴恐衣或綻破歿仍憂我身使存心得墮

汝州王待制以長篇勸予復飲酒因謝之

前因飲酒多乃苦傷營衛嘔血踰數升幾乎成病肺上

念父母老下念妻兒稚不死常抱痾於身寧自貴樊子
來勸我止飲良有謂公復遺我詩責我詞甚毅指以年
齒衰非酒何養氣春飲景可樂夏飲暑可避秋飲心忘
愁冬飲暖勝被醉歌人不怪醉言人不忌在酒功實多
止酒酒何罪假如壽九十今子已半世不飲徒自苦未
必止為利胡汨妄與真恐乖達者意屈原吟澤畔方悟
獨醒累子居今之時安免人病議是以告子勤子守亦
謬計我讀纔一過不覺顏起愧自茲願少飲但不使疾

熾書此以謝公公言誠有味

陪王待制清涼院觀牡丹賦詩

公言牡丹盛未覩古人詩品衆自爭貴葉多方見奇名
因他姓著色為別根移華髮我何感洛陽年少時

和王待制牡丹詠

誰移洛川花一日來汝海濃淡百般開風露幾番改傍
欄人自醉惜翦春有待使君方少年共賞喜我在

洛陽牡丹

古來多貴色歿去定何歸清魄不應散艷花還所依紅
樓金谷妓黃真洛川妃朱紫亦皆附可言人世稀

汝州登慈寺閣望嵩岳

崢嶸古寺閣蒼山插晴簷少室出天外巍巍何尊嚴王
都在其下風露國所需日暮飛雲歸已失中頂尖

睡意

少時好睡常不足上事親尊日拘束夜吟朝誦無暫休
目眚生瘡臂消肉今踰四十無所聞又況喪妻仍獨宿

虛堂淨埽焚清香安寢都忘世間欲花時啼鳥不妨喧
清暑北窓聊避燠葉落夜雨聲滿階雪下曉寒低壓屋
四時自得興味佳豈必鏘金與鳴玉萬事易厭此不厭
真可養恬無天促且夢莊周化蝴蝶焉顧仲尼譏朽木
人事幾不如夢中休用區區走榮祿

三月十四日汝州夢

我歸十九年飲不負升斗昨夕夢見之謂須多置酒雖
慰魂來言定不復入口俟當返吾廬且為貯罌缶夢寐

何敢欺從笑愚所守

再別仲儀

前別歲月遠道同情相親三旬忽相見愈厚不厭頻昔
云思數面今無愧古人睠然東去懷紛若陌上塵

夕發陽翟

我行陽翟道暮雨原上急麒麟塚相望霹靂碑下立農
耕傍山去鬼火迸林入莫問泉下人馬墮衣更濕

缺月

金
卷二十七
缺月來照屋角時西家狗吠東家疑夜深精靈鬼初動
僊宰古莽無風吹

道次靈井

井面水不動傍分龍鱗激泉氣時生漚上湧光的灤深
苔翠堪染石底清可覲旱歲或來祠彈絃屬靈現

答江十鄰幾

蔡州雖非遐作書素所懶春風領燕來得君詞款款燕
迴須在秋此報莫言緩何日見嵇康重彈廣陵散

喜謝師厚及第

時第一甲二十八人君名在二十三

宿雨洗新綠朝日初聞鶯風從天門來吹下玉簡名列
星二十八經緯何縱橫南方朱鳥目光焰令人驚其餘
撒沙衆龜鼈瓜瓠明吾欣安石後世世有令聲

孟夏二日通判太博惠庭花二十枝云是手植因
以為答

前日已春盡夏卉抽嫩青惟君所植花餘紅猶滿庭常
惜畏景逼贈未及飄零欲插為之醉但慙髮星星

水丘於西湖得活鯽魚三尾見遺余頃在襄城獲
數尾時歐陽永叔方自乾德移滑臺留待其至且
有詩後居京師蔡仲謀者亦有以贈乃思襄時所
留復有詩於今三得三詠之矣

襄城得圓鯽留以待吾友大梁又得之始憶終按酒今
君復持贈重念滁陽守滁陽石瀨中此物豈無有三得
實嘉遺我敢自私口口且不爭甘事亦難利誘

和江鄰幾見寄

自此許州起慶歷
六年夏盡其年終

清風當晝起吹我庭下槐軒軒枝上葉碎影亂綠苔左
右無人聲時有啼禽來啼禽感所懷其音一何哀思歸
無曉夕血滴山榴開曰予當是時為之腸九迴江子方
謫官復有擬古才遠寄平淡辭曷報瓊與環

雀奪燕巢生四雛

去年燕營巢銜泥入我廬秋歸春復來橫被雀所居翩
然去不較義者欲與除毀覆必傷卵愛彼此何疎乃竢
長黃口逐之寧曰紓果得生四雛卉色頭戢如後當還

燕巢穿屋不害余

和歐陽永叔啼鳥十八韻

南方窮山多野鳥百種巧口乘春鳴深林叅天不見日
滿壑呼嘯誰識名但依音響得其字因與爾雅殊形聲
我昔曾有禽言詩粗究一二啼喙情苦竹岡頭泥滑滑
君時最賞趣向精餘篇亦各有思致恨未與盡衆鳥評
君今山郡日無事靜聽鳥語如交爭提壺相與來勸飲
戴勝亦助能勸耕我念此鳥頗有益如欲使君勤以行

勸耕幸且強職事勸飲亦冀無獨醒杜鵑蜀魄哭歸去
小人懷土慎勿聽城頭春鳩自謂拙鵲巢輒處安得平
高窠喬木美毛羽哢吭葉底無如鶯口中調簧定何益
下啄蚯蚓孰曰清自餘多類不足數一一推本煩神靈
我居中土別無鳥老鴉鸛鵒方縱橫教雛叫噪日羣集
豈有勸酒花下傾願君切莫厭啼鳥啼鳥於君無所營
和永叔桐花十四韻

湛湛碧井水其上有梧桐春隨井氣生白花飛濛濛曉

枝滴甘露味落寒泉中結實待瑞羽歲晚半枯空桐既
無鳳皇井豈潛蛟龍乃知至神物未易令人逢當時集
潁川偶值黃次公次公入為相此烏曷不從遂使神鵲
崔竟用奇怪窮我言非毀古欲遵平直蹤我願二千石
但使德化隆有桐鳳不來於桐無愧容有鳳政不舉於
鳳何為崇答君桐花篇聊以發我哀

和王仲儀詠癭二十韻

汝水出山險汝民多病癭或如雞精滿或若猿嘍並女

慙高掩襟男大闊裁領飲水擬注壺吐詞侔有鯁樗里
既已聞杜預亦不幸秦人號智囊吳瓠繫狗頸臍胝常
住頤伶仃安及脛只欲仰問天無由俯窺井挾帶歲月
深冒犯風霜冷厭惡雖自知剖割且誰肯不惟羞把鏡
仍亦愁弔影內療煩羊廐外砭費針穎在水曰楠榴刻
之可為皿此誠無所用既有何能辟音屏膨脝廁無首臙
腫異臙頂難將面目施可與胎胞逞賢哉臨汝守世德
調金鼎氓俗雖醜乖教令日修整風土恐隨遷晨昏憂

屢省儻欲便慈顏名城不難請

憶吳松江晚泊

念昔西歸時晚泊吳江口迴隄遡清風淡月生古柳夕
鳥獨遠來漁舟猶在後當時誰與同涕憶泉下婦

使者自隨州來知尹師魯寓止僧舍語其處物景
甚詳因作詩以寄焉

驛使話漢東故人遷謫處所居雖非居有樹即嘉樹日
膳或雞狔時蔬多筍芋夜堂蛇結蟠晝戶鵲噪聚著書

今未成愛靜已得趣予欲訪其人炎蒸未能去

夏日對雨偶成寄韓仲文昆弟

日日城頭雨還添湖上波窓中人自聽門外潦應多不
畏車生耳還愁麥化蛾吾廬無所有頻看壁間梭

憶將渡揚子江

月暈知天風舟人夜相語平明好挂帆白浪須出浦此
身猶在吳歸夢預到楚今日念同來吾妻已為土

秀叔頭風

吾兒久失恃髮括仍少櫛曾誰具湯沐正爾多蟣虱變
黑居其元懷絮宅非吉蒸如蟻亂緣聚若蠶初出鬢搔
劇蓬葆何暇嗜梨栗翦除誠未難所惡累形質

稚子獲雀雛

屋頭小雀雛氣力苦未長乘暄學調羽忽挂蜘蛛網其
母不能救啁啾空下上乃為人所探不是蟲絲枉

丙戌五月二十二日晝寢夢亡妻謝氏同在江上
早行忽逢岸次大山遂往遊陟予賦百餘言述所

覩物狀及寤尚記句有共登雲母山不得同宮處
倣像夢中意續以成篇

晝夢與予行早發江上渚共登雲母山不得同宮處何
嗟不同宮似所厭途旅樹杪俯鳥巢圻轂方仰乳雄雌
更守林號噪見飛鼠鼠驚豎毛怒裊枝如發弩逡巡吼
風雲遠望射崑雨東南橫虹霓萬壑水噴吐下尋歸路
迷欲暮各愁語忽覺昏已非空庭日方午

蜜

燕銜芹根泥蜂掇花上藥帶雨兩股飛所取日能幾調
和露與英凝甘滑於髓天寒百蟲蟄割房霜在已燕已
成雛歸蜂憂凍餒死乃見萬物心多為造化使

王德言自後圃來問疾且曰圃甚蕪何不治因答
幾日不行圃野草過人頭客怪苦荒穢誰與持鋤鉤雖
然自薶薙抱病方告休即當秋風高掃擇將遲遊

夢覩

閉目光不揚夢覩良亦審既非由目光所見定何稟白

日杳無朕冥遇當在寢此恨不可窮悲淚空流枕

悲書

悲愁快於刀內割肝腸痛有在皆舊物惟爾與此共衣裳昔所製篋笥忍更弄朝夕拜空位繪寫恨少動雖死情難遷合姓義已重吾身行將衰同穴詩可誦

合流曹光道惠鉅李知其炎酷中有此味味亦可樂也輒以詩寄

賴傍成蹊李其實小於拳誰知皴枝瘦生此紺玉鮮摘

以筠梢籠沈以石根泉濛濛粉未落粲粲葉猶連蔭樹
咀甘液安知有苦煎報君惜茲樂時詠逍遙篇

深夏忽見柰樹上猶存一顆實

累累後堂柰落盡風雨枝行樂偶散步倚杖聊縱窺林
葉隱孤實山鳥曾未知物亦以晦存悟茲身世為

病癰在告韓仲文贈烏賊背生醅醬蛤蜊醬因筆
戲答

我嘗為吳客家亦有吳婢忽驚韓夫子來遺越鄉味與

官官不識問儂儂不記雖然苦病癰饒叻未能忘

寄光化退居李晉卿

久無歸田人今喜于去祿移家漢水濱日見漢水綠川
鱗可為養山毛可為藪竟歲厭往還行提樂風俗青巾
舩上郎漆鬢顏如玉倚檣臨落照獨唱江南曲聽若在
江南歡然自為足我心雖有羨未遂平生欲更期畢婚
嫁方可事嵒麓買山須買泉種樹須種竹泉以濯吾纓
竹以慕賢躅此志應不忘他時同隱錄

汝南江鄰幾云鄖南並淮浮光山有張隱居種松
檜於其上養母甚孝時有猛獸馴庭中又郡西麻
田山土沃泉美久不墾有劉叟者闢而居之近董
氏黃氏欲買土為鄰故江有慕之之作予輒次其
韻

峩峩淮山上中有隱者棲不知松檜下但見虎豹蹊人
羣固已遠樵客入猶迷且奉采蘭養應無抱玉啼麻田
異麻源石路春無泥高士不近俗更在西嶺西石泉飲

自足深壑無人躋不學淮南王安問犬與雞二人逍遙
性所樂唯杖藜復有來慕鄰他年寧答嵇願君且勉職
聖世未易睽

魏文以予病渴贈薏苡二叢植庭下走筆戲謝

愧無相如才偶病相如渴溟水有丈人薏苡分叢茂為
飲可扶衰餘生幸且活安知惡已者不願變野葛

宛陵集卷二十七

欽定四庫全書薈要卷一萬四千四百六十八

集部

宛陵集卷二十八

宋 梅堯臣 撰

和資政侍郎湖亭雜詠絕句十首

遠山

插雲千萬重一望不可暫前嶺與後峯翠色濃復淡

蓮塘

不畏塘雨急鈿葉自相遮文禽忽驚去衝落波上霞

漁潭

烟潭深不極，鑑碧無菱花。
日脚下波心，澄江見魚蝦。

稻畦

淺淺碧水平，青青稻苗長。
偏知楚客愛，白鷺飛下上。

苔徑

林間夏雨滋，復有斜陽照。
綠淨不搖風，從教春草笑。

流泉

石齒嚼寒聲，齟齬紫曲處。
有時浮落英，又過城根去。

小橋

伐桂向芳洲跨波灣勢小時愛游人渡游人在林杪

漁艇

古木剝為舟野藤牽作纜釣人寒雨中遠望烟蓑暗

采菱

紫角菱實肥青銅菱葉老孤根未能定不及寒塘草

汀鷺

食魚日已晚矯翼烟際還不與鴈鷺競風標亦自閒

王德言夏日西湖晚步十韻次而和之

雨餘殘照在塘靜獨行行荷積水珠重天收霓帔輕倦
禽依臥柳聚蚓殢坳泓帽側林枝礙裳褰野蔓繁芳韜
園客剝蒲刃水祆驚泱泱流泉活濛濛夕霧平榴房生
蠹落蛛網害蟲成坎黽無時怒渾魚自樂清高臺從獸
窟古道有根橫寫景未能就娟娟月上城

新沼竹軒

作軒仍見竹蕭灑排青幢斜鳥與落月靜影畫寒窓光

沒影亦沒激水自淙淙夜深猶讀易誰更憶清江

麥門冬內子吳中手植甚繁鬱罷官移之而歸不
幸內子道且亡而茲草亦屢枯今所存三之一耳
遂感而賦云

香草葉常碧本生崑澗邊佳人昔所愛移植堂階前自
吳北歸梁復以盆盎遷佳人路中死此草未忍捐與我
日憔悴根不通下泉勤勤為澆沃稍見萌穎鮮終當置
墳側長茂松柏埏

野鴿

孤來有野鴿，背眼肖春鳩。飢腸欲得食，立我南屋頭。我
見如不見，夜去向何求。一日偶出羣，盤空恣嬉游。誰借
風鈴響，朝夕聲不休。飢色猶未改，翻翅如我仇。炳哉有
靈鳳，天抑為爾儔。翕翼處其間，顧我獨遲留。鳳至吾道
行，鳳去吾道休。鴿乎何所為，勿汙吾鐺甌。

孫曼叔暮行汴上見鶻擊蝙蝠以去語於予

野鶻性決裂，所食惟鸚飛。小鳥不入眼，拳發強弩機。日

暮未有獲豈擇大與肥
瞥下攫蝙蝠去以填腸
饑休笑老鷗飽銜得腐鼠歸

寄宋中道

爾書我不答爾怒從爾罵
天馬新羈時氣橫未可駕
儻我一日死爾豈無悲
咤惟知道義深小失不足謝

梨花憶

欲問梨花發江南信始通
開因寒食雨落盡故園風
白玉佳人死青銅寶鏡空
今朝兩眼淚怨苦屬衰公

畫竹枝扇

石上老瘦竹忽在
紈扇中執之意已涼
不待搖清風小
節未見粉淚痕應合紅
日將炎暑退畏蠹生秋蟲

兩日苦風思江南

擺磨萬水聲朝吼暮不止
吹沙作雲飛物狀顏色死
還念江上山落瀑鳴幾里
茅茨松竹間翠的門前水下窺
石穴魚出入數十尾是時殘照微
古路誰家子羸馬入
烟林區區何若此昔笑今已迷
薄宦正如彼何當歸去

來臨流重洗耳

送謝師厚歸南陽

竹館蔭以風灑水坐猶熱念子遠歸時焦烟起車轍落
日原上微鳥棲人欲別我心明月在相照異盈缺

資政王侍郎南京留守

百世興王地乘時已建都離宮萬戶寄京邑四方模尹
以名臣擇朝仍宿哲俞果資卿屬重將俾國人蘇迎餞
車交轍奔馳士結途許嗟人惠奪宋遲德恩敷日月天

卷二十八
闡近山河地勢趨壓城隋柳密開苑漢池枯文物希前
代謳歌得大儒鄒枚跡雖古賓從豈今無

送通判太博

相見不在久見久未必親無為歲月淺豈不膠漆均猶
嗟欲別日事疊如排鱗安得獨攜酒遠送秋水濱

和韓子華桂花

莫以天下桂皆為月中物猶言月有兔野豈無狡窟空
山桂花多艷色粲然發樵客不知貴奈何薪爨屈

宿安上人門外裴如晦胥平叔來訪

胥裴喜我至冒雨夜出城燈前相對語怪我面骨生為
言憔悴志因意多不平亦見子頷鬚長黑已可驚知子
有所立毛髮隨世情子心且如舊後輩苦前輕

宋中道失小女戲寬之

宋子失汝嬰苦將造物怪造物本無惡爾責亦已隘且
如工作器寧復保存壞收淚切勿悲他時多壻拜

刁經臣將歸南徐許予尋隱居之所及亡室墳地

因走筆奉呈

欲居江上江試與問京峴嘗觀鮑家詩心慕已不淺行
當卜結廬依農事清畎傍葬吾先妻同穴晚未免買谷
勿險深求岡要平顯松竹應所宜蒿萊預教翦我志決
不移君言幸須踐

尉氏縣阮籍嘯堂

古城多瘦棘莽莽連荒臺不見長嘯人黃土空崔嵬北
顧蓬池上枯廢生蒿萊當時思大梁還望已徘徊今我

復懷昔豈不傷且哀烏呼有遺響英靈同土灰

送趙仲寶永興乾耀提舉捉賊

知君少以勇曾向蕭關戰橫刀突虜圍奪馬傷胡箭當
時獨免歸猛毅邊人羨今來提漢卒寇盜清秦縣未足
賀功名功名它日見

合流河堤上亭子

隔河桑榆晚藹藹明遠川寒魚下灘時翠鳥飛我前山
藥植瑣細野性仍所便令人思濠上獨詠莊叟篇

早至潁上縣

夜發曉未止獨行淮水西
明知寒草露暗濕瘦驄蹄半
滅竹林火數聞茅屋雞秋天
畏殘暑不為月光迷

欲陰

鸛鵒知天風鶉鴝知天雨
途路厭塵昏車馬煩泥阻
陰仍老易覺體質預辛楚
安坐與壯年慎勿忘酒脯

正陽驛舍夢鄭并州寄書開之即三山圖也

我來清淮側夢得鄭公書
開書一把玩乃是三山圖山

形雄且邃筆畫簡而疎紙幅不盈尺萬仞勢有餘卷置
懷袖中意獲寤已無

新婚

前日為新婚喜今復悲昔聞中事有託月下影免隻慣
呼猶口誤似往頗心積幸皆柔淑姿稟賦誠所獲

登舟

向起風沙地暫假烏榜還浩然起遠思欲與魚鳥閒景
目洗已清詠句稱且慳時看秋空雲雨意濃淡間

諭鷗

翩翩沙上鷗安用避漁舟
漁人在魚利何異爾所求

釣蟹

老蟹飽經霜紫螯青石殼肥
大窟深淵曷虞遭食沫香餌
與長絲下沈寧自覺未免利
者求潛潭不為邈

取蟻

東灣暖無沙有蟻淵泥下輕
舸復翠竿預致曾誰捨剝
肉不知數持為楚鄉鮓嗜味
固足珍況亦椒橙假

潁水費公渡觀飲牛人

渡口飲牛歸村墟夕陽裏黃犢未及羣抱帶過寒水利
心乃如仁耕領破不止當時彼何高獨能譏洗耳

潁水

潁水苦流瀑淺平秋與冬岸深開地勢底碧寫天容道
枉隨灣去村遙盡日逢迷魚是潭曲寧見窟蛟龍

打魚

插葦截灣流寒魚未能越安知呂師意設網遮其闕不

須芳餌懸何待清歌發所獲勝輪竿寧聞憂澤竭

八日就湖上會飲呈晏相公

明當是重九黃菊還開不先將掇其英秋逕未能有
顏齡無以制但不負此酒紅頰誰使歌公憐牛馬走

九日擷芳園會呈晏相公

今日始見菊雖見未全開猶勝昔無酒持望白衣來破
顏浮金英雜蟻已盈杯何必採丹萸結佩上高臺自不
愧佳節安聽飛鴻哀

謝晏相公

刻意向詩筆行將三十年
嘗經長者目未及古人肩
昔慕荀文若多稱王仲宣
今慙此微賤重辱相君憐

道中謝晏相公寄酒

頽泥墨印幾壺醪將慰窮途阮步兵
一夜臨流對明月
舉杯愁聽鴈來聲

水苔

深苔何所若苦詠費毫尖
繞繞水仙髮茸茸蛟客髯
綠

紫秋石淨嫩值翠篙黏尚毛參差行薄言無此嫌

新鴈

塞鴈與寒來夜落汀洲宿泊船人不寐月下聲相續

依韻和晏相公

微生守賤貧文字出肝膽一為清潁行物象頗所覽泊
舟寒潭陰野興入秋茭因吟適情性稍欲到平淡苦辭
未圓熟剌如劇菱芡方將挹溟海器小已激灩廣流不
拒細愧抱獨慊慊疲馬去軒時戀嘶芻秣減茲繼周南

篇短橈寧及艦誠知不自量感涕屢揮摻

以近詩勢尚書晏相公忽有酬贈之什稱之甚過
不敢輒有所叙謹依韻綴前日坐末教誨之言以
和

嘗記論詩語辭卑名亦淪

公曰名不盛者辭亦不高

寧從陶令野

公曰

彭澤多野逸田舍之語

不取孟郊新

公曰郊詩有五言一句全用新字

琢礫難希

寶噓枯強費春今將風什付可與二南陳

途中寄上尚書晏相公二十韻

驚飈入林鴉亂飛舞空落葉相追隨
秋權摧物不見跡
但使萬古生愁悲
登山臨水昔感別
身作旅人安得宜
單舟匹婦更無婢
朝餐每愧婦親炊
平生獨以文字樂
曾未敢恥貧賤為官
雖寸進實過分名姓
已被賢者知
疎愚生不謁豪貴
守此退縮行將衰
潁州相公秉道德
一見不以論高卑
久調元化費精力
猶且未倦刪書詩
唐之文章別蕪穢
纖悉寧有差毫釐
謂其耽學可與語
便語淵奧祛僂疑
浮言近意不歷口
直欲海窟拏蛟螭

再拜膝前荷勤誨垂橐相載歸忘饑解艇水驛無幾舍
新詩又遣牙兵持上言行李覽物景聊可與婦陳酒庖
下言狂斐頗及古陶韋比格吾不私相公貴且事翰墨
我輩豈得專遊嬉今將蒿芹薦俎豆定亦不以微薄遺
嘗令有詠無巨細當因川陸舟車貽日對順流思疾置
老魚姦怯潛鱗鬣

舟中夜與家人飲

月出斷岸口影照別舸背且獨與婦飲頗勝俗客對月

漸上我席暝色亦稍退豈必在秉燭此景已可愛

舟中行自采苟杞子

野岸竟多杞小實霜且丹繫舟聊以掇粲粲忽盈盤助
吾苦羸茶豈必採琅玕自異騎華人百金求秘丸昔聞
王子喬上帝降玉棺此焉即不免但願在世安

蔡河阻淺

陸乏百鈞馳水假孤艇進潁苦灣灘長曲折劇篆印蔡
方阻淺涸寸步出慳吝膠舟看在前暗磧礙難慎誰能

使暮盪空自思禹濬丈夫少壯時必在馳驅駿

黃駁

維舟飯孤村隔岸見黃駁瘦牧正苦饑瘡烏復下啄閔
心無柘彈投塊徒自數力小不能中汗顏慙且渥

入澤王河口

遠水路已別古汭未窮源定知前山雨瀑沫至且渾暗
生秋草下稍復夏潦痕更去待月上猶應可到門

西華逢李令子翼

金
卷二十八
適從潁水歸道逢西華長不見二十年顏鬚我非曩君
問洛陽日舊友多泉壤更別如前時應復少吾黨

合流值雨與曹光道飲

秋風豪衰林秋雨阻歸客賴有故時交舉杯聊岸幘談
兵與論文曾不涉陳迹必竟無所施醉去思泉石

寄送謝師厚餘姚宰

我從淮上歸君向海濱去安知無幾舍邂逅不相遇頗
知飛空雲到月不得附月行既不留雲亦值風故誠知


會合難豈是忘所赴我雖躡新屨心不捨舊屨誰謂若
世人食瓜思棄瓠君南我赴北日見陽鴈度茲欲遠寄
音鴈行高且驚但誦金石言於時儻無忤

李密學遺苔醬脯云是自採為之

溪流寒且急岸草已凋摧石髮尚堪把江人曾不來誰
知烏榜去留採碧潭隈持作吳鄉味能令案滌杯

宛陵集卷二十八

謹案卷二十七第三頁後八行幾乎成病肺刊本
乎訛不據宋詩鈔改



總拔官庶吉士臣張能照
校對官庶吉士臣戴心亨
謄錄舉人臣羅步雲